

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

R J E Š E N J E

po Zahtjevu za pokretanje postupka podnesenom od strane privrednog subjekta „Novo Nordisk A/S“ Predstavništvo Sarajevo, protiv Zavoda zdravstvenog osiguranja Kantona Sarajevo , radi ograničavanja tržišne konkurencije

Sarajevo
Novembar, 2008. godine



Broj:01-02-26-023-22-II /08
Sarajevo, 20.11.2008. godine

Na osnovu člana 42. tačka g), a u vezi sa članom 4. stav 1. i članom 10. stav 2. Zakona o konkurenciji («Službeni glasnik BiH», br. 48/05 i 76/07) i člana 108. Zakona o upravnom postupku («Službeni glasnik BiH», br. 29/02, 12/04 i 88/07) u postupku pokrenutom na zahtjev privrednog subjekta „Novo Nordisk A/S“ Predstavništvo Sarajevo, zaprimljenog dana 11.06.2008. godine pod brojem: 01-02-26-023-II/08, a po Zaključku o pokretanju postupka broj: 01-02-26-023-7-II/08 od 11.09.2008. godine, protiv Zavoda zdravstvenog osiguranja Kantona Sarajevo, Konkurencijsko vijeće na 76. sjednici održanoj dana 20. 11. 2008.godine, donijelo je sljedeće

R J E Š E N J E

- 1.** Utvrđuje se da Zavod zdravstvenog osiguranja Kantona Sarajevo svojim aktom broj: 05-/08 od 05.05.2008. godine, upućenog svim ugovornim apotekama, ograničava i kontroliše tržište usluga izdavanja lijekova na recept osiguranim licima na teret sredstava Zavoda zdravstvenog osiguranja Kantona Sarajevo, što ima za posljedicu sprječavanje i ograničavanje tržišne konkurencije u smislu člana 4. stav 1. tačka b) Zakona o konkurenciji.
- 2.** Nalaže se Zavodu zdravstvenog osiguranja Kantona Sarajevo da u roku od 8 (osam) dana od dana prijema ovog rješenja, stavi van snage akt broj: o5-/08 od 05.05.2008. godine i omogući privrednom subjektu «Novo Nordisk A/S» i svim ostalim proizvođačima lijekova, čiji se lijekovi nalaze na važećoj Listi lijekova koji se propisiju i izdaju na teret sredstava Zavoda zdravstvenog osiguranja Kantona Sarajevo, da se njihovi lijekovi izdaju na recept osiguranim licima na teret sredstava Zavoda zdravstvenog osiguranja Kanton Sarajevo.
- 3.** Nalaže se Zavodu zdravstvenog osiguranja Kanton Sarajevo da u ostavljenom roku dostavi na uvid Konkurencijskom vijeću dokaze o izvršenju obaveza iz tačke 2. ovog rješenja.
- 4.** Zbog ograničavanja i kontrole tržišta u smislu člana 4. Stav 1. tačka b) Zakona o konkurenciji, izriče se novčana kazna Zavodu zdravstvenog osiguranja Kantona Sarajevo u visini od 50.000,00 KM i odgovornom licu, direktoru, Mahmutu Đapo u visini od 15.000,00 KM u smislu člana 48. stav 1. tačka a) i stav 2. Zakona o konkurenciji, koju su dužni platiti u roku od 8 (osam) dana od dana prijema ovog rješenja.
- 5.** Odbija se zahtjev privrednog subjekta «Novo Nordisk A/S» Predstavništvo Sarajevo u dijelu koji se odnosi na povredu člana 10. stav 2. tačka c) i d) Zakona o konkurenciji kao neosnovan.
- 6.** Odbija se zahtjev privrednog subjekta «Novo Nordisk A/» Predstavništvo Sarajevo za donošenje privremene mjere u smislu člana 40. Zakona o konkurenciji.

7. Ovo rješenje je konačno i objaviće se u Službenom glasniku BiH, službenim glasilima Entiteta i Brčko Distrikt BiH.

OBRAZLOŽENJE

Konkurencijsko vijeće je dana 11.06.2008. godine, pod brojem 01-02-26-023-II/08 zaprimilo Zahtjev za pokretanje postupka u smislu člana 28. Zakona o konkurenciji («Službeni glasnik BiH», br. 48/05 i 76/07), (u daljem tekstu: Zakon), protiv Zavoda zdravstvenog osiguranja Kantona Sarajevo, Ulica Ložionička br. 2, 71000 Sarajevo (u daljem tekstu: Zavod) radi povrede člana 4. Stav 1. i člana 10. stav 2. Zakona, podnesen od strane privrednog subjekta «Novo Nordisk A/S» Predstavništvo u Sarajevu, Trg Solidarnosti br. 2, 71000 Sarajevo, (u daljem tekstu: Novo Nordisk ili Podnosilac zahtjeva).

Zaprimljeni Zahtjev nije bio kompletan, te je Podnosiocu zahtjeva dana 20.06.2008. i 31.07.2008. godine upućen zahtjev br: 01-02-26-023-1-II/08 i 01-02-26-023-2-II/08 za dopunu istog i uplatu administrativne takse.

Zahtjev je dopunjen 11.08.2008. godine dopisom broj:01-02-26-023-4-II/08, nakon čega je Konkurencijsko vijeće utvrdilo da je isti kompletan i uredan u smislu člana 28. stav (1) Zakona, te je Podnosiocu zahtjeva u smislu člana 28. stav 3. Zakona, izdalo potvrdu dana 08.09.2008. godine, broj: 01-02-26-023-5-II /08 o prijemu kompletnog i urednog Zahtjeva.

U svom Zahtjevu, Podnosilac zahtjeva, opisuje činjenično stanje i okolnosti koje su razlog za podnošenje Zahtjeva te navodi:

- da je Zavod 14.05.2008. godine dostavio Podnosiocu zahtjeva putem faxesa dopis broj: 05-/08 od 05.05.2008. godine, kojim ih obavještava da se od 02.06.2008. godine na teret sredstava Zavoda mogu dobiti samo tri proizvoda (inzulina) kompanije Novo Nordisk umjesto dosadašnjih šest,
- da je Zavod istovremeno uputio svim ugovornim apotekama obavijest o navedenim izmjenama u «Odluci o listi lijekova koji se propisuju i izdaju na teret sredstava Zavoda zdravstvenog osiguranja Kantona Sarajevo, kao i načinu njihovog propisivanja i izdavanja» («Službene novine Kantona Sarajevo» broj 2/08) (u daljem tekstu: Odluka o listi), prema kojoj se tri lijeka Podnosioca zahtjeva brišu sa liste. Sve ugovorne apoteke su na osnovu te obavijesti sa danom 02.06.2008. godine prestale izdavati navedene lijekove osiguranim licima na recept na teret Zavoda,
- da je po odredbama Zakona o lijekovima («Službene novine Federacije BiH», broj 51/01), Zakona o zdravstvenom osiguranju («Službene novine Federacije BiH», br. 30/97 i 7/02) i Zakona o Vladi Kantona Sarajevo («Službene novine Kantona Sarajevo», broj 24/03), a na prijedlog ministra zdravstva, Vlada kantona Sarajevo utvrdila važeću «Listu lijekova koji se propisuju i izdaju na teret sredstava Zavoda Kantona Sarajevo» (u daljem tekstu: Lista lijekova), te se izmjene i dopune Odluke o listi i Liste mogu vršiti samo na način i po postupku po kojem su doneseni,
- da je dana 19.03.2008. godine, neposredno pred donošenje predmetne Odluke o listi, Zavod tražio da Podnosilac zahtjeva dostavi veleprodajne cijene za navedene proizvode, što je s njegove strane i učinjeno, a potom je dana 14.05.2008. godine obavijestio Podnosioca zahtjeva da se tri njihova proizvoda skidaju sa Liste lijekova. Podnosilac zahtjeva predpostavlja da su predmetni lijekovi skinuti sa Liste lijekova upravo zbog cijena, te tvrdi da to nije mogao niti smio biti kriterij za njihovo skidanje s Liste lijekova, jer su cijene bile utvrđene u skladu sa Naredbom o

utvrđivanju referalnih cijena lijekova («Službene novine FBiH»,br.14/07) koju je donio federalni ministar zdravstva i čija je primjena obavezujuća za kantonalne zavode zdravstvenog osiguranja,

- da je Odlukom o listi, propisano da će Zavod samo za lijekove koji se nalaze na Listi lijekova, a za koje nije utvrđena referalna cijena, zadržati pravo samostalnog odlučivanja o cijeni takvog lijeka, koju će snositi prilikom finansiranja nabavke lijekova iz sredstava obaveznog zdravstvenog osiguranja. Podnosilac zahtjeva naročito skreće pažnju na činjenicu da u Službenim novinama KS od 14.01.2008. godine u posljednjoj objavljenj Listi lijekova cijene pojedinih inzulina konkurentskih kompanija nisu istaknute,
- da je na sastanku održanom dana 15.06.2008. godine sa Ministrom zdravstva Kantona Sarajevo, prim.dr Mustafom Cupolovom, Podnosilac zahtjeva informisan kako ni ministar ni Ministarstvo zdravstva Kantona Sarajevo o ovom aktu Zavoda br.05-/08 od 05.05.2008. godine nisu unaprijed obavješteni, a na osnovu čega Podnosilac zahtjeva tvrdi da je Zavod postupio samoinicijativno i bez dozvole nadležnog organa, što predstavlja grubo kršenje zakona,
- da je ovakvo djelovanje Zavoda u suprotnosti sa Zakonom te da je došlo do ograničavanja i podjele tržišta, odnosno izvora snabdijevanja te izvršena primjena različitih uslova za identične transakcije sa drugim privrednim subjektima, čime je Podnosilac zahtjeva doveden u nepovoljan položaj u odnosu na konkurenciju, odnosno druge dvije konkurentske kompanije stavljene u privilegovan položaj,
- da je ovakvim djelovanjem Zavoda, ograničeno tržište prometa lijekova koji se izdaju na recept, a koji su uvršteni na važeću Listu lijekova, na štetu korisnika, te da ovakvo jednostarno i nezakonito ponašanje Zavoda predstavlja zloupotrebu dominantnog položaja iz člana 10. stav 2. Zakona o konkurenciji,
- da je doveden u neravnopravan položaj u ostvarivanju prihoda na tržištu lijekova koji se propisuju i izdaju na teret sredstava Zavoda, jer je prodajom predmetnih lijekova u 2007. godini ostvario prihod od 1.557.640,00 KM te je sad izbacivanjem ovih lijekova sa Liste lijekova, za isti uskraćen,
- da Zavod svojim aktom brisanja predmetnih lijekova sa Liste lijekova nije nanio štetu samo Podnosiocu zahtjeva, već i potrošačima odnosno korisnicima predmetnih lijekova, što je potkrijepio pismom: Udruženja dijabetičara Kantona Sarajevo, Udruženja endokrinologa i dijabetologa u Federaciji BiH i Pedijatrijske klinike kliničkog centra Univerziteta Sarajevo u kojima se od Zavoda traži da poništi akt broj 05-/08 od 05.05.2008. godine,
- da smatra da su ispunjeni uslovi iz član 40. Zakona te traži donošenje rješenja o privremenoj mjeri.

Analizirajući zahtjev za pokretanje postupka i dokumentaciju koju je Podnosilac zahtjeva dostavio uz isti, Konkurencijsko vijeće je ocijenilo da nije moguće bez provedenog postupka utvrditi postojanje povreda Zakona na koje Podnosilac zahtjeva ukazuje, te je na sjednici održanoj dana 11.09.2008. godine, u skladu sa članom 32. stav (2) Zakona donijelo Zaključak o pokretanju postupka broj: 01-02-26-023-7-II/08.

U skladu sa članom 33. Zakona, Konkurencijsko vijeće je primjerak navedenog Zaključka o pokretanju postupka dana, 11.09.2008.godine pod brojem: 01-02-26-023-12-II/08 dostavilo na odgovor Zavodu.

Zavod je dana 25.09.2008. godine Konkurencijskom vijeću pod brojem: : 01-02-26-023-13-II/08 dostavio odgovor na Zaključak o pokretanju postupka u kome ističe slijedeće:

- da je svojim dopisom br. 05-1595/08 od 05.05.208. godine obavijestio Podnosioca zahtjeva o inzulinima, koji se izdaju osiguranicima na teret sredstava Zavoda, čiji je proizvođač, a kojim dopisom je ujedno obavješten da se tri njihova inzulina brišu sa Liste lijekova, koji se izdaju na teret sredstava Zavoda, a objavljeni su u Odluci o listi.

- da je brisanje navedenih inzulina sa Liste lijekova, Zavod obavio u skladu sa Naredbom o utvrđivanju referalnih cijena lijekova, gdje je u tački 5. stav 2. precizno određeno da za lijekove kojima nije utvrđena cijena u skladu sa Naredbom, a nalaze se na listi lijekova, svi zavodi zdravstvenog osiguranja zadržavaju pravo samostalnog odlučivanja o cijeni takvog lijeka koju će snositi prilikom finansiranja nabavke lijekova iz obaveznog zdravstvenog osiguranja.
- da se navedeni inzulini, koji su proizvod Podnosioca zahtjeva, nalaze na Listi lijekova, ali da za njih nije utvrđena referalna cijena Naredbom, te je stoga Zavod primjenio član 5. stav 2. Odluke o listi i samostalno odlučio o cijeni predmetnih lijekova.
- da je u postupku odlučivanja o cijeni pribavio tri ponude, te izabrao ponuđača sa najnižom ponuđenom cijenom inzulina, a potom izvršio brisanje predmetnih proizvoda Podnosioca zahtjeva sa Liste lijekova, a sve u skladu sa procedurom utvrđenom odredbama Naredbe i Odluke o listi.
- da je dopisom br.05-/08 od 05.05.2008.godine obavjestio sve ugovorne apoteke o nastalim promjenama u Listi lijekova
- da je Klinika za endokrinologiju, dijabetes i bolesti metabolizma Kliničkog centra Univerziteta u Sarajevu, dala mišljenje da predložena lista inzulinskih preparata apsolutno omogućava pacijentima kvalitetnu i dobru medicinsku zaštitu u Kantonu Sarajevo, a ujedno je sačinjena na kriteriju ekonomičnosti i racionalnosti trošenja materijalnih sredstava.
- da je shvatanje Podnosioca zahtjeva da se brisanjem njegovih proizvoda sa Liste lijekova krši Zakon, zasnovano na nepoznavanju procedure koja je precizirana federalnim i kantonalnim podzakonskim aktima, koji su osnovni dokumenti za rad Zavoda i Komisije za lijekove.
- da je u 2007.godini zabilježen trend porasta potražnje predmetne vrste inzulina drugog proizvođača, što negira tvrdnju Podnosioca zahtjeva da je skidanjem njihovih inzulina sa Liste lijekova, napravljen problem psihološkog prilagođavanja pacijenata na nove inzuline i uskraćeno pravo na izbor terapije.
- da se protivi donošenju bilo kakve privremene mjere, jer niti jednom svojom radnjom nije povrijedio Zakon.

U daljem toku postupka, obzirom da se radi o predmetu sa suprotnim interesima, Konkurencijsko vijeće je održalo usmenu raspravu u skladu sa članom 39. Zakona. Usmena rasprava je održana dana 21.10.2008. godine u prostorijama Konkurencijskog vijeća i ispred Novo Nordisk-a je prisustvovao punomoćnik, advokat Sead Miljković i direktor Novo Nordiska Mladen Vlaški, a ispred Zavoda prisustvovali su punomoćnici Hadžibajrić Nermana i Tvrtković Nedim

Tokom usmene rasprave stranke su se izjasnile da u cjelosti ostaju kod zahtjeva za pokretanje postupka odnosno odgovora datog na Zaključak o pokretanju postupka, stim što su svoje pismene akte stranke detaljnije obrazložile kao i razloge za podnošenje zahtjeva odnosno za donošenje akata od 05.05.2008. godine.

U provođenju postupka Konkurencijsko vijeće je utvrdilo relevantno tržište za predmetni slučaj.

U skladu sa članom 3. Zakona i čl. 4. i 5. Odluke o utvrđivanju relevantnog tržišta («Službeni Glasnik BiH», broj 18/06) relevantno tržište se određuje kao tržište određenih proizvoda koji su predmet obavljanja djelatnosti privrednih subjekata na određenom geografskom području.

Relevantno tržište proizvoda obuhvata sve proizvode koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu posebno njihova bitna obilježja, kvalitet, uobičajnu namjenu, način upotrebe, uslove prodaje i cijene.

Relevantno geografsko tržište obuhvata cjelokupan ili značajan dio teritorije Bosne i Hercegovine na kojoj privredni subjekti djeluju u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuju od uslova konkurencije na susjednim geografskim tržištima.

Konkurencijsko vijeće je utvrdilo da je relevantno tržište u ovom predmetu tržište usluga izdavanja lijekova na recept osiguranim licima na teret sredstava Zavoda na području Kantona Sarajevo.

Na osnovu uvida u dokumentaciju iz spisa predmeta te ocjene izjava datih na usmenoj raspravi, Konkurencijsko vijeće je utvrdilo sljedeće činjenično stanje:

- Vlada Kantona Sarajevo usvojila je Odluku o listi lijekova, a sastavni dio navedene odluke je i Lista lijekova, koji se propisuju na teret sredstava Zavoda, a na kojoj listi se nalaze i tri inzulina Novo Nordiska i to pod rednim brojem 46. A10AB05 inzulina aspart Novo Rapid Fleh Pen, pod rednim brojem 52. A10AC01 inzulina humani Insulatard Novolet i rednim brojem 58. A10AD01 inzulina humani Mihtard 30 NovoLet, a koje je Zavod svojim aktom broj: 05-/08 od 05.05. 2008. godine na posredan način brisao sa navedene liste. Istim aktom Zavoda, sa Liste lijekova osim navedenih inzulina, skinuti su i drugi lijekovi različitih proizvođača lijekova i to: red.broj 37. Actrapid HM 100, Novo Nordisk, red.br. 40,41,42. Insuman HR 1799 rapid, Sanofi Aventis, red.br.48. Apidra, Sanofi Aventis, red.br.51. Insulatard HM, Novo Nordisk, red.br.54. Insuman HR 1799 basal, Sanofi Aventis, red.br.57. Mixtard 10 NovoLet, Novo Nordisk, red.br.59. Mixtard 40 NovoLet, Novo Nordisk, red.br.61,62,63. Insuman HR 1799 comb 15/85, Sanofi Aventis, red.br.64. Insuman HR 1799 comb 25/75, Sanofi Aventis, red.br.67,68,69. Insuman HR 1799 comb 50/50, Sanofi Aventis i red.br. 70. Lantus, Sanofi Aventis.

Zavod je, kako je to obrazložio u odgovoru na Zaključak o pokretanju postupka, izvršio brisanje u skladu sa članom 5. stav 2. Odluke o listi i tačkom 4. stav 5. Naredbe o utvrđivanju referalnih cijena lijekova Federelnog ministarstva zdravstva. Naime, članom 5. stav 2. Odluke o listi je propisano da za lijekove koji se nalaze na Listi lijekova, a za koje nije utvrđena referalna cijena Zavod će u skladu sa tačkom 4. stav 5. Naredbe o utvrđivanju referalnih cijena lijekova, zadržati pravo samostalnog odlučivanja o cijeni takovog lijeka, koju će snositi prilikom finansiranja nabavke lijekova iz sredstava obaveznog zdravstvenog osiguranja.

Međutim, Konkurencijsko vijeće je uvidom u Listu lijekova, koja je sastavni dio Odluke o listi, utvrdilo da navedena tri lijeka Novo Nordiska, koja su brisana sa Liste lijekova, imaju utvrđenu referalnu cijenu i pozivom na član 5. stav 2. Odluke o listi i na tačku 4. stav 5. Naredbe o utvrđivanju referalnih cijena lijekova, Zavod nije imao ovlaštenje da samostalno odlučuje o cijeni navedenih lijekova, odnosno da ih posredno briše sa Liste lijekova, o čemu je pismeno obavijestilo sve ugovorene apoteke Kantona Sarajevo, aktom broj: 05-/08 od 05.05.2008. godine.

U postupku koji je prethodio donošenju rješenja, Konkurencijsko vijeće je cijeno da li akt Zavoda br: 05-/08 od 05.05.2008. godine ograničava i kontroliše tržište dovodeći pojedine privredne subjekte u nepovoljan položaj u odnosu na druge i da li se navedeni akt može smatrati zabranjenim sporazum u smislu člana 4. Stav 1. Zakona.

Imajući u vidu činjenicu, da je navedeni akt Zavoda imao za posljedicu faktičko dejstvo i uticaj na tržište lijekova koji se izdaju na teret sredstava Zavoda, Konkurencijsko vijeće smatra da se navedeni akt može smatrati kao zabranjeni sporazum iz člana 4. stav 1. Zakona, te da je Zavod

svojim aktom broj: 05-/08 od 05.05.2008. godine posredno ograničio tržišnu konkurenciju lijekova koji se izdaju na teret sredstava Zavoda.

Ograničavanjem tržišne konkurencije izdavanjem lijekova na teret sredstava Zavoda pojedini privredni subjekti proizvođači lijekova, kao što je Podnosilac zahtjeva dovedeni su u nepovoljan položaj u odnosu na druge proizvođače lijekova, čiji se lijekovi izdaju na teret sredstava Zavoda. Zavod je tako na direktan način omogućio drugim privrednim subjektima odnosno proizvođačima lijekova povoljnije uslove u poslovanju, dok je Podnosiocu zahtjeva istovremeno stvorio nepovoljne uslove poslovanja o čemu je i detaljno iznio podatke Podnosilac Zahtjeva, iako su svi imali isti status prema Odluci o listi u pogledu prodaje lijekova na teret sredstava Zavoda.

Zavod je na ovaj način onemogućio da mnogi pacijenti, koji troše navedena tri lijeka Novo Nordiska, iste nabavljaju pod povoljnijim uslovima, odnosno na način kako im je to omogućila Vlada Kantona Sarajevo, a o čemu su se u tom pogledu i pismeno izjasnile pojedine stručne institucije iz oblasti zdravstva.

Dakle, kako je nesporno utvrđeno, akt Zavoda br: 05-/08 od 05.05.2008. godine ima za posljedicu sprečavanje, ograničavanje i narušavanje tržišne konkurencije te je odlučeno kao u tački 1. dispozitiva ovog rješenja.

U tom pogledu naloženo je Zavodu da u roku od 8(osam) dana od dana prijema ovog rješenja navedeni akt izmijeni, tako što će omogućiti Podnosiocu zahtjeva, kao i svim ostalim privrednim subjektima, da svoje lijekove, koji se nalaze na Listi lijekova, propisuju i izdaju na teret sredstava Zavoda, kako je to odlučila Vlada Kantona Sarajevo Odlukom o listi i o tome pismeno obavijesti Konkurencijsko vijeće kao i Podnosioca zahtjeva.

Polazeći od nesporno utvrđene činjenice da je Zavod grubo prekršio odredbe člana 4. Stav 1. Tačka b) Zakona, kao i druge propise koji propisuju izdavanje lijekova na teret sredstava Zavoda, Konkurencijsko vijeće je u smislu člana 48. Stav 1, tačka a) i stava 2. Zakona, izreklo novčanu kaznu u iznosu od 50.000,00 KM Zavodu i novčanu kaznu od 15.000,00KM odgovornom licu direktoru Mahmutu Đapo. S obzirom na visinu izrečene novčane kazne, Konkurencijsko vijeće nije imalo prvenstveno za cilj kažnjavanje zbog kršenja Zakona, već da upozori Zavod, kao i odgovorna lica, da poštuju pravila tržišne konkurencije. Osim toga, izrečena novčana kazna je blaga, u odnosu na visinu novčane kazne, koja je zapriječena u skladu sa članom 48. Zakona.

Nadalje u svom zahtjevu Novo Nordisk ističe da Zavod zloupotrebljava svoj dominantni položaj u smislu člana 10. Stav 2. tačka c) i d) Zakona, ističući da Zavod stvara različite uslove poslovanja privrednim subjektima, čime ih dovodi u neravnopravan i nepovoljan konkurencijski položaj. Članom 9. i 10. Zakona je propisano šta se smatra dominantnim položajem i na koji način se zloupotrebljava dominantan položaj.

Imajući u vidu nespornu činjenicu da Zavod nema dominantan položaj, u smislu člana 9. Zakona, te da ne učestvuje na relevantnom tržištu prodaje lijekova na teret sredstava Zavoda, to se iz navedenih razloga Zahtjev Novo Nordiska u dijelu koji se odnosi na zloupotrebu dominantnog položaja od strane Zavoda, odbija kao neosnovan.

U vezi zahtjeva Novo Nordiska za donošenje privremene mjere iz člana 40. Zakona, Konkurencijsko vijeće je ocijenilo da nije bilo mjesta donošenju iste.

Tačno je da je Podnosilac zahtjeva za posljedicu imao direktne štete po osnovu navedenog akta Zavoda, koji je ocijenjen da nije u skladu sa Zakonom , ali ta pretrpljena šteta nije tolika da bi dovele u pitanje poslovanje Novo Nordiska na relevantnom tržištu lijekova. Naime, lijekovi Podnosioca zahtjeva, koji su neposredno brisani sa Liste lijekova i dalje su bili prisutni na tržištu lijekova i bili su dostupni pacijentima.

Osim toga Konkurencijsko vijeće je o Zahtjevu Podnosioca odlučilo u zakonskom roku i ovim rješenjem naloženo je Zavodu da u kratkom roku otkloni uočene nepravilnosti i omogući Podnosiocu zahtjeva da navedene lijekove propisuje i izdaje na teret sredstava Zavoda.

Na osnovu svih relevantnih činjenica i dokaza izvedenih u toku postupka, Konkurencijsko vijeće je odlučilo kao u dispozitivu ovog rješenja.

Pouka o pravnom lijeku

Ovo Rješenje je konačno i protiv istoga nije dozvoljena žalba. Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno, objave ovoga Rješenja.

Predsjednik

Ibrica Lakišić